

# Ovra communabla en Tujetsch

Cantaduras e cantadurs tuatschins lavuran vid il «Project 2000»

DA HANS HUONDER

■ **Il chors mischedai da Sedrun e Rueras presentan l'auter onn da cureisma l'ovra «Il siat sogns viarvs» dil cumponist César Franck. Quei succeda en collaboraziun cun different(a)s solist(a)s ed igl Orchester Surselva. Sco quei ch'igl iniziand e dirigent dall'ovra, Tarcisi Hendry da Sedrun, ha detg enviers La Quotidiana, seigi il desideri da collaboraziun dils dus chors gia dapi in temps avon maun. Per quei motiv hagien ins nezegiau la caschun da seprestar comunablamein igl onn 2000. Rond 80 cantadur(a)s, solist(a)s e musicist(a)s vegnan a seprestar la sonda e la dumengia da palmas en la baselgia parochiala a Sedrun cun l'ovra «Il siat sogns viarvs». Il exercezis han gia entschiet e sco quei che Tarcisi Hendry di, seigi la fascinaziun ed igl entusiassem da tuts**



Cantaduras e cantadurs da Tujetsch exerciteschan pigl onn 2000.

MAD

participonts fetg gronds, quei che motiveschi a moda extraordinaria e faciliteschi cheutras la lavur. Per l'organisaziun sco tala ei vegniu fundau in comite. L'ovra classica da César Franck,

cantada en latin, vegn adina puspei representada durent il temps da cureisma. Ella ei zun impressiunonta.

> PAGINA 3

Igl avrel 2000 presentan ils dus chors dalla Val Tujetsch «Il siat sogns viarvs» da César Franck

## Chors da Tujetsch cun in grond project →

■ **Cantaduras e cantadurs dalla Val Tujetsch, ensemen cun solist(a)s ed igl Orchester Surselva, ein dapresent lundervi da sepreparar per ina gronda ovra da cant. «Project 2000» senumna il concert che duei vegnir daus l'auter onn igl avrel en baselgia parochiala a Sedrun. Iniziant e dirigent dall'ovra ei Tarcisi Hendry da Sedrun.** Cun la realisaziun dil «Project 2000» va in desideri dils dus chors tuatschins en vigur. Suententer che omisdus ein sepresentai el decuors dils davos onns e decennis en differents concerts ed a fiastas, ei il giavisch d'ina ovra communabla staus per biars la finamira. Igl onn 2000 vegn nezegiaus per la caschun da tschentiar in accent communabel. 60 cantaduras e cantadurs, solistas e solists – denter auter l'indigena *Sandra Munsch* – sco era ils musicists digl Orchester Surselva sut la direenziun da *Claudio Simonet* ein dapi in temps vid las preparativas. L'ovra duei vegnir representada ils 15 e 16 d'avrel 2000, pia la sonda e la dumengia da palmas, ella baselgia parochiala a Sedrun. Il comite d'organisaziun dil project consista da *Marcus Munsch* (president), *Sep Lurenz Berther* (actuar), *Linus Vinzens* (cassier), *Tarcisi Hendry* e *Hans Monn* (dirigents). Tut en tut vegn l'ovra a custar 20 000 francs. Per cuvierer silmeins ina part dils cuosts ein ins lundervi da tscherchar sponsurs e donaturs.

#### Finamira dalla veta

Per il dirigent Tarcisi Hendry che ha dirigiu ton il Chor mischedau e baselgia

Rueras sco era il Chor mischedau Sedrun, ei l'ovra prida a mauns in'aventura, gie schizun la finamira dalla veta: «Sco dirigent han ins da temps en temps il giavisch da presentar enzatgei extraordinari, enzatgei ch'ins fa buca mintga onn. Cun l'ovra tschercada communablamein cun il musicist *Ursin Defuns* da Mustér va quei desideri en vigur. Che la fascinaziun ei aschi gronda astgel jeu era attribuir a tuttas cantaduras e tuts cantadurs e musicists ch'ei semess cun grond entusiassem vid igl exercezi.» Schegie ch'ins haveva all'entschatta schizun patertgau vid la representaziun d'ina opera ni ina ope-retta, ein ins lu sedecidius per ina ovra classica durant il temps da Cureisma. Sco quei che Tarcisi Hendry di, hagien ins aunc mai menau si in'ovra da tala dimensiun en Val Tujetsch.

Dapi 25 onns diregia Tarcisi Hendry in ni l'auter chor en Val Tujetsch. La scolaziun e perfecziun musicala ei succedida per ina part al seminari da scolasts a Cuera e per la part principala a moda autodidactica. Ultra da sia activitad da dirigent fa el era part dil chor dils Cantins a Mustér.

#### In'ovra classica

«Ils siat sogns viarvs» dil cumponist César Franck (1822–1890) ei in'ovra per solists, chor ed orchester. En connex cun il «Project 2000» fuorman las cantaduras ed ils cantadurs da Sedrun e Rueras la part dil chor. Aunc buca tschercau han ins tuttas solistas e tuts solists. En-

tochen ussa ei la indigena *Sandra Munsch* semessa a disposiziun sco soprano. Per la part musicala procura igl Orchester Surselva.

L'ovra entscheiva cun in prolog cantaus d'ina solista e suandada dils siat plaids che Cristus ha detg vid la crusch. Quels vegnan cantai per part dil chor e per part dil chor ed ils solists. Denter ils differents plaids vegn ligiu il text. «Ins sa dir ch'ei settracti d'ina ovra classica meditativa e da devoziun avon l'jamna sontga. La representaziun ei fetg impresiunonta e tenor miu manegiar schai ella era el caracter da nus Romontschs. Ins sa buca vegnir unfis da tedlar», di Tarcisi Hendry.



Sut la direenziun da Tarcisi Hendry e plirs dirigents gidonters vegn gia exercitau en Val Tujetsch per la presentaziun che ha liug en in onn.